

ÁR ÑOHO AR PEDRO

Ár ñoho ar he'mi bi 'yot'a ar Pedro

Ar nzengwa

1 Nuga dar Simu, t'engagi ar Pedro, ár 'begogi ne ár mpotegi ar tsi Hmu Hesukristo. Di ot'ahü nunar he'minu nu'ahü xka tsuhü n'ar nzátho jamfi ngu nö'ö di pe'sje. Xka tsuhü nunar jamfinu, ngetho xa ar hogajö'i ma Jöhu ne ma Pohotehu ma tsi Hmuhu Hesukristo.

²Dá hñuxa ar nhwëki ne ar hogam'ui gi höñhu, ngetho gi pöhu Jö ne ma tsi Hmuhu Hesukristo.

Nuya ku di hñöxa ár m'ui Jö

³Jö xa pe'sa ár ts'edi, ne xi 'rakagihu gatho nö'ö di höñhu ga 'buhu ne ga pefu xiñho, ngetho nö'ö togo bi zokagihu xa döta ár nsunda, gese'ö bi ñ'udi ga pötwabihu.

⁴Ne xi 'raju ya nzátho ñhöt'i thota ár mhödi ne xa döta. Njap'u da tsa di hñöx'ahü ár m'ui Jö, ngetho xka hyehup'u ar ts'oki jawa har ximhai, t'ot'e tenga yá ts'onhe ya jö'i.

⁵Jange nu'ahü xa gi umba ri müihu gi tetwabihu da mewi ri jamfihu ar hogam'ui, ha nunar hogam'ui di pewi ar hoga mfödi.

⁶Nunar hoga mfödi di pewi ar nts'uni, ha nunar nts'uni di pewi ar ts'eti, ha nunar ts'eti di pewi ar nhwëki.

⁷Ha nunar nhwëki di pewi ar mhöte n'a ngu n'a, ne nö'ö gi mhöhu n'a ngu n'a, di pewi gi möhu gatho nu ma'ra.

⁸Ngetho nu'mu xa gi pe'suyu, ne gi jafu da xu, hinda ma da m'ep'u xka pöhu ar tsi Hmu Hesukristo, hingi 'buhu njap'utho hinter m'efi ri tehu.

⁹Ha nu'u togo hingi pe'sa nuya ñhoyu pewi yá jamfi, ot'a ngoda, hingi honga nö'ö bi e mhets'i, ne xi pumhni xi nsukwa yá ts'oki xki 'yot'a mam'et'o.

¹⁰Jange tsi kuhü, xa gi umba ri müihu gi ñ'uhü xi ts'oñ'ahü ne xi thañ'ahü, ngetho nu'mu gi 'yothu njap'u, xi ñhemi gi tahü.

¹¹Ne njap'u ma da sok'ahü n'ar döta ne nzátho goxthi, ne gi kuthu har ts'ut'wi hiñham'u da thege, ár meti ma Pohotehu ne ma tsi Hmuhu Hesukristo.

¹²Nuga hinga ma ga tsaya ga beñ'ahü gathoyu, mödi xka pöhu ne xi zet'a ri jamfihu gi teñhu nö'ö majöni xi nsi'ahü.

¹³Di beni nupya di 'bũtho, gehnu ma 'befi ga bemp'ahu gi 'yothuyũ.

¹⁴Ngetho di pödi ngut'a ma ga hekwa nunar ndo'yonu, ngu xi xikagi ar tsi Hmu Hesukristo.

¹⁵Ma ga umba ma mũi n'ehe, nú'mu xka ñ'e'be nunar hainũ, nu'ahu hyax'mu gi benthũ nuya xta ut'ahu.

Damajöni nu'u togo bi hyandwase ár nsunda ar tsi Hmu Hesukristo

¹⁶Nuje xta ut'ahe ngu da handwasehe ár ts'edi ne ár 'ñehe ma tsi Hmuhũ Hesukristo, hinge ngu enga ya 'bede xi bense ya jö'i.

¹⁷Da hanthe nú'mu Jö ar Dada bi 'ñe'spa ár nsu ne bi umba ar nsunda, núnu habũ bi nheki nunar mhö ndi 'ñe har nsunda mhets'i, mi enö: Gehnu ma hmöka T'u, jakagi ga njohya.

¹⁸Ne nuje da ohe nunar mhönu ndi 'ñe mhets'i nú'mu ndi 'bu'behe har jöpa t'ohö.

¹⁹Gatho nuya thogiyũ xi ñ'udi majöni nö'ö xki mönga yá m'ehni Jö. Jange xiñho gi jafumasu nuya mhöyũ, ngu n'ar ñot'i yot'ahu madedda ar 'bexui, gi to'mhu da hats'i ne da yot'ahu ar njötso poxa 'bu xudi.

²⁰Honse beñhu m'et'o, gatho nö'ö xi 'yot'a yá m'ehni Jö har T'ofö, hinda tsá ga bensehu nö'ö tema ne da mö, go utkagihu Jö.

²¹Ngetho nuya te bi mönga nuya m'ehni'u, hingar mfenise n'ar jö'i. Bi t'umbabi nu'u yá 'bego Jö mi 'bu n'ar m'ui xint'axi, mi möñ'u ngu mi xipa ár Hñö Jö nda mö.

Ya kate m'ehni ne ya kate utate

(Ar Huda 3-13)

2 Mi 'bu nuya pa'u ya kate m'ehni har hnini Israel, ngu

ma da nja ya kate utate habũ gi 'buhũ n'ehe. Nuyũ ma da kut'a ñ'öntho ya ts'omhö da hwata ar nijö. Hinge hönse'ö, ma da konga ar tsi Hmu togo bi gũka har ts'oki, ne njap'u ma da nhwati n'agitho.

²Ne nzeýe ma da demba yá ts'o'befi, ne go yá ts'okiyũ ma da ts'anga ar 'ñu majöni.

³Xa ya nzibjö, ma da gũk'ahu yá nthöhö di mönga ya nhemhñö. Nuyũ yanũ maham'u xi t'ekwa yá mfei, ne 'bap'utho ar pa da nhwati.

⁴Ngetho Jö himbi pumbabi ya enxẽ bi nts'oki. Bi 'yut'a har tsibi, ne bi 'ñet'a har fadi xi m'exui, t'egi da zonga ár pa ar mfei.

⁵Ne himbi pumba nuya jö'i mi 'bu mam'et'o, ba pempa ar dö'ye bi go'ma xoge ar ximhai mi 'bu har ts'oki. Hönse bi 'ye ar Noe mi uta ya jö'i ar hogam'ui, nunũ ne ma yoto bi k'ont'wi.

⁶Ne mba m'empa ar mfei nda nhwata ar hnini Sodoma ne Gomora, hönse ar 'bospi bi gohi. Ne bi jap'u ngu n'ar nt'udi ma da njapabip'u nu'u ne da m'u n'ar ts'om'ui.

⁷Ne bi 'yekwa ár te ar Lot togo mar hogajö'i, mi tupa ár mũi mi handi hanja mi 'bu nuya ts'ojö'iyũ.

⁸Ngetho nunar hogajö'inu mi 'buhwi'u, jange hyax'mu mi tupa ár hogamui mi handi ne mi o'spa yá ts'o'befi.

⁹Ja nhekinũ, ar tsi Hmu njambödi da m̃axa da tho ar ts'ati nu'u ya hogajö'i, ne da 'yekwatho yá mfei nu'u togo ot'a ar ts'oki, da t'umba nunar pa da thöxamajöni.

¹⁰Ne töte yá mfei nu'u togo bi denga gatho nö'ö mi ne yá ndo'yo.

'Yo'u har ts'oki ne ot'a gatho nö'ö xints'otho, hingi ne togo da meñni. Xa ya gese ne xi me yá ñö, hingi ntsu da zanga nu'u togo pe'sa yá ts'edi.

¹¹Nuya enxe mödi töte yá ts'edi ne yá nsunda, tsupi hingi a n'ar mfei da zuhyu nú'mu 'bu'u hár nthandi ar tsi Hmu.

¹²Ha nuya jö'iyu ñömañ'u nö'ö hingi pödi, ngu ya meti hiñ'otho yá mfeni, xi t'ent'i da tho ne da nhwati. Nuyá ts'okise da zixa har 'bexui.

¹³Ma da hñonga yá nthöhö ngu ya ts'okte, ngetho gehyu yá johyayu, zoda ar hyadi ot'a gatho nö'ö ne'u. N'ar m'etsayu, ngetho nú'mu gi ntsixkwihu, ñ'entho ot'u nö'ö hingi ho.

¹⁴Nuyu honse xa hyokwa yá nthöti ma'ra, hingi tsabi ot'a ya ts'oki. Hat'i da zo ha yá 'yeyu nu'u togo hinxi zeta yá ñ'emui. Ha yá mui xi nzöi hyokwa yá meti ma'ra. Yá bötsiyu ar 'bexui.

¹⁵Xi hye'u ar 'ñu majöni, ne xi demba ár 'ñu ar Balam ár t'u ar Beor, togo xa bi mö ár nthöhö ar ts'oki.

¹⁶Mödi n'ar meti ndu bi ñö ngu n'ar ñ'oho, bi zuí himbi hyegi nda 'yot'a nö'ö mi beni.

¹⁷Nuya jö'iyu ñhehwi ya pothe hinte unga ar dehe, ne ngu ya gui tuxta ar 'yomndöhi. Xi t'ekwabi da m'u har 'bexui hiñham'u da göts'i.

¹⁸Ngetho ñö ya mhö ñ'ets'i hinte yá ñho. Njap'u ko'sa nu'u majöni mi ne nda hye nu'u togo 'bu har ts'oki, ne kadi da 'yot'a gatho nö'ö ne yá ndo'yo.

¹⁹Xipabi'u da xot'a yá nthöt'i, ha gese'u xi nthöt'a har ts'oki. Ngetho

nö'ö togo da nthöhö, nu togo bi döhö pontho xi döt'i, japi da 'yot'a nö'ö ne'ö.

²⁰Xa majöni di xi'ahu, nu'mu xki k'othmö'u ha ya ts'oki ja har ximhai ngetho xki bötwa ár 'ñu ar tsi Hmu ne ar Pohöte Hesukristo, ne da mengi da zo habu mi ku'u, da m'edi ne yá m'ui töpa ár nts'otho mi 'bu m'et'o.

²¹Ngetho mar ñhomhö hinxi böhmö'u ar 'ñu tsixa ar hogajö'i, hinge honse bi bödi, ne bi mengi bi hyep'u ar döta 'bepate bi t'umbabi.

²²Ne xpa epabi ngu enga ar mhö majöni: Ar 'yo pengi juxa ár ts'odi, ne ar ts'udi xi nsati, pengi da ntönga har bohaj.

Ar pa da nheki ár ts'edi
ar tsi Hmu xi 'ñep'u

3 Ma tsi hmöka kuhu, gehnu ár ñoho ar he'mi di ot'ahu, ne gatho yohoyu di hup'a ri muihu gi pe'su n'ar mfeni xint'axi.

²Di ne gi beñhu nuya mhö bi mönga mam'et'o yá hoga m'ehni Jö, ne nuya 'bepate bi zok'ahu ma tsi Hmu ne ma Pohötehu, gehnu bi xi'ahu yá mpote ar tsi Hmu gi 'ñehu.

³Pöhu m'et'o, nuya ngöxapa ma da e ya thente di 'bu ngu nese'u.

⁴Di eñ'u: Te bi ja ar ñhöt'i nda e ar tsi Hmu Hesukristo. Ngetho bi the ma palehu, ha nunar ximhai njangutho ngu ar pa bi thoki.

⁵Nuyu nese da pumhni gehnu ár mhö Jö bi hyoka mam'et'o ar mhets'i ne ar ximhai. Ba ehyu har dehe ne oxta har dehe.

⁶Jange nunar ximhai mi 'bu mahamu, bi hwata ar dehe mi ñuts'i.

⁷Ha nunar mhets'i ne nunar hai
'bupya, getnų ár mhö Jö ekwi da nzo
har tsibi nunar pa da thöxamajöni,
ne da t'umba ár mfei ya ts'okte.

⁸Tsi kuhų, yo gi pumhnių n'ehe,
nunar tsi Hmu handa n'apa ngu
'ret'anthebe ya jeye, ne 'ret'anthebe
ya jeye handa ngu n'apatho.

⁹Ar tsi Hmu hingi hu'sta ar pa da
'yot'a nö'ö xi nôt'i, ngu benga 'ra.
Pe'skagihų ar ts'eti hingi ne togo
da m'edi, ne'ö gatho da 'yot'wa yá
ntsot'mi.

¹⁰Ha nunar pa da e ar tsi Hmu,
ma da zo ngu n'ar bë tso 'bu nxui.
Nu'mų, nuya mhets'i ma da nhwati,
da nt'o n'ar döta ñuni, ne gatho
nö'ö te janų ma da xut'a har tsibi,
ha nu ar ximhai ne gatho nö'ö te
jawa ma da nzo.

¹¹Nu'mų ma da nhwata gathoyu,
yo'ö hingi 'buhų n'ar m'ui xint'axi
ne gi ñhogajö'ihų.

¹²Ne gi ndo'mhų da zo ár pa
Jö, ne xa gi umba ri muių gi
jafų ngut'a da zohö. Nuya pa'u ar
mhets'i ma da nde ne da xut'i, ne
gatho nö'ö te janų ma da mi har
tsibi.

¹³Ha nuju di to'mhų man'ar 'ra'yo
mhets'i ne man'ar 'ra'yo ximhai,
habų honse ja ar hogam'ui.

¹⁴Jange tsi kuhų, nu'mų gi to'mhų
nuya ñhöt'iyų, umba ri muių da
diñ'ahų hinte ma jaxt'i gi pe'sų,
dar nt'axi'ihų ne gi 'buhų n'ar
hogam'ui.

¹⁵Ne pöhu xiñho, nunar tsi Hmu
pe'sa ar ts'eti honi da mpo gatho
ya jö'i, jangu ma tsi kuhų Pablo xi
t'umba ar hoga mfödi xi 'yot'ahų.

¹⁶Gatho nuya he'mi xi 'yot'i,
nonga nö'ö xta xi'ahų. 'Rayų xi
ñhemi da födi te ne da 'ñenö.
Jange nu'u hints'u pödi ne hingi
tse yá mui, pati. Jap'u nu ma'ra ya
T'ofö n'ehe, ne da 'yot'a ngu ne'u,
ne njap'u honse yá mfeise.

¹⁷Jange nu'ahų ma tsi hmöka
kuhų, xka pöhu, jamasuhų yo ma
da hya'ahų yá ts'oki ya ts'okte, ne
gi hyehup'u ár ts'edi ri jamfihų.

¹⁸Nö'ö gi 'yothų, dá hñuts'i gi
pöhu ma tsi Hmuhų ne ma Pohötehu
Hesukristo, ne dá te ri mfödių hár
nhwëki. Go di 'ñep'u da t'umba
ar nsunda nupya ne hiñham'u da
ntsaya. Dá njap'u.